

Apertura di exposicion "E Lens di Mi Wowo" 2011 na Insight Art Studio

ORANJESTAD - Diahuebs anochi riba Dia di Prensa a keda inaugura oficialmente e exposicion di fotografia "E Lens di Mi Wowo" 2011, patrocinada pa RBTT Bank y dedica na e veterano fotografo di prensa, "Django" Simoons.

E apertura di e expo aki cu ta tumando luga na Insight Art Studio a conta cu presencia di un grupo grandi di invitado, no solamente di e gremio periodistico, sino tambe di e sector cultural, comercial y politico di nos pais.

Sr. Jubi Naar kende a fungi como maestro di ceremonia tabatin palabra di elogio pa su colega "Django" Simoons, y el a conta algun di su anecdotan inolidabel den su carera di 44 aña como fotografo di prensa, specialmente di casonan di sucesonan.

Sr. Naar a reconoce cu sr. Simoons ta un di e pilaman di prensa, y un "enciclopedia di noticia y historia". E ta un di e fotografonan cu den decadanan 60, 70 y te hasta na cuminsamento di aña 80 cu a ser califica como e "fotografo campeon", hunto cu Djiespi Frankel. Igualmente el a menciona difunto Ramiro Tromp di Amigoe, Janchi Tromp, Hary Croes, nan ta hendenan cu nan historia di e trabou cu nan a haci den prensa como fotografo ta hopi largo y ta hopi cos nan a pasa aden, segun sr. Jubi Naar a relata durante e anochi di apertura di "E Lens di Mi Wowo" 2011.

Sr. Leo Vrolijk kende cuater aña pasa a bin cu e iniciativa di organisa un exposicion di fotografia caminda no solamente ta ser exhibi e trabou visual di su colega, sino cu el a crea tambe un escenario pa duna honor na nos pioneronan di prensa na Aruba. El a bisa



cu pa 18 aña largo prome cu el a bin cu e iniciativa aki, no tabatin niun expo pa prensa, y el a madura durante casi dos aña, e idea aki prome cu el a bin cla cune.

El a gradici tur su patrocinadonan, specialmente RBC/RBTT Bank, na e artista Alida Martinez di Insight Art Studio, y Checkpoint Color entre otronan. Esaki tabata e di cuater expo cu pa cuater aña consecutivo sr. Leo Vrolijk a organisa, cual e aña aki ta conta cu 30 participante y 200 potret den su totalidad. Ya caba el a anuncia cu e expo aki lo bira mas grandi otro aña den cuadro di su prome lustro di existencia.

Vice President Sales & Service Support di RBTT, sr. Giovanni Croes a expresa di parti di RBC y RBTT su gradicimento na prensa, y el a destaca cu e relacion

entre e RBC/RBTT y prensa, semper tabata uno hopi bon, amistoso y amical. "Semper cu nos fin nos cosnan semper nan ta support nos all the way", asina sr. Croes a declara. Pesey e ta haya cu e contribucion ta mutuo, y pa tal motibo nan ta sostene e tipo di expo aki cu ta destaca e trabou realisa pa prensa.

Di su banda sr. Django Simoons tabata masha limita den su palabranan, pero di un forma emocional y den compania di su casa, y su famia, el a gradici su colega den prensa y di sr. Leo Vrolijk su organisacion cu a "corda cu mi t'ey, y mi no t'ey pa hopi temponan. Danki pa tur cos, Jubi a bisa di mi tur cos caba". Django Simoons a ricibi un album cu tur e fotografianan cu a ser exhibi den exposicion "E lens di Mi Wowo" 2010 cu aña pasa a ser dedica na sr. Janchi Tromp.

Insight Art Studio ta situa na Paradera Park (tel. 566-4070), y tur hende ta cordialmente invita pa bishita e exposicion di potretnan aki. □

